

DOMENIE IV DI PASCHE

Antifone di jentrade cf. Sal 32,5-6

Dal boncûr dal Signôr e je incolme la tiere;
cu la sô peraule a son stâts fats i cîi, aleluia.

Si dîs Glorie a Diu.

Colete

Diu onipotent e eterni,
meninus a spartî la gjonde dal cîl,
par che l'umil trop dai fedêi al rivi
là che lu à precedût la fuarce dal pastôr.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 2,14.36-41

Diu lu à fat Signôr e Crist.

Dai Ats dai Apuestui

Te dî des Pentecostis, Pieri, jevant sù cui Undis, ur fevelà cussì a grande vôs: «La famee di Israel e à di savêlu cence dubi di sorte che Diu al à fat Signôr e Crist propit chel Jesù che vualtris lu vês metût in crôs!».

Chestis peraulis ur lerin al cûr e i diserin a Pieri e a chei altris apuestui: «Fradis, ce vino di fâ?». E Pieri ur disè: «Convertîtsi e ognidun di vualtris che si fasi batiâ tal non di Jesù Crist in remission dai vuestris pecjâts. Po dopo o cjaparês il don dal Spirtu Sant. Che di fat la promesse e je par vualtris e pai vuestris fîs e par ducj chei che a son lontans e che il Signôr vuestri Diu ju clamarà». E cun tantis altris peraulis ju preave e ur raccomandave: «Salvaitis di cheste gjernazie fûr di strade!». Alore chei che a vierzerin il cûr a la sô peraule a forin batiâts, e in chês stesse dî si meterin cun lôr un trê mil personis.

Peraule di Diu.

SALM RESPONSORIÂL dal Salm 22

R. Il Signôr al è il gno pastôr: no mi mancjarà nuie.

O ben:

R. Aleluia, aleluia, aleluia.

Mi fâs polsâ là che i passons a sverdein,
mi mene là che a son aghis frescjis.
Al tire sù la mê vite, in gracie dal so non
mi mene par trois di justizie. **R.**

Ancje se o ves di cjaminâ par une foranate scure,
dî nissun mâl no varès pôre, parcè che tu mi sês dongje;
il to baston e la tô vuiscje
a son lôr che mi parin. **R.**

Tu prontis denant di me une taulade
presince dai miei nemîs,
il gno cjâf tu âs onzût di vuela
e il gno bocâl al è plen che al stranfe. **R.**

Propit, bontât e boncûr mi compagnaràn
ducj i dîs de mê vite,

te cjase dal Signôr
par une vore di agns o restarai. **R.**

SECONDE LETURE 1 Pi 2,20-25

O sês tornâts dal pastôr des vuestris animis.

De prime letare di san Pieri apuestul

Benedets, se fasint il ben, o sopuartarês cun pazience i displasês, Diu lu varà agrât. Di fat vualtris o sês stâts clamâts a fâ chest par vie che

ancje Crist al à patît par vualtris
lassantius un speli
par che o ledis daûr des sôs olmis.
Lui nol à fat nissun pecjât
e no si à cjatât imbrois di sorte te sô bocje;
svilanât, nol rispundeve cun vilaniis
e patint nol menaçave svindics
ma al meteve la sô cause tes mans di chel
che al judiche seont justizie.
Lui al à quartât i nestris pecjâts tal so cuarp
sul len de crôs
par che, no vivint plui pal pecjât,
o vivessin pe justizie;
midiant des sôs plais o sês stâts vuarîts.
O jeris fûr di trop come pioris
ma cumò o sês tornâts dal pastôr
e dal vuardean des vuestris animis.

Peraule di Diu.

CJANT AL VANZELI Zn 10,14

R. Aleluia, aleluia.

Jo o soi il bon pastôr, al dîs il Signôr;
o cognòs lis mês pioris e lis mês pioris mi cognossin me.

R. Aleluia.

VANZELI Zn 10,1-10

O soi jo la puarte des pioris.

Dal vanzeli seont Zuan

In chê volte, Jesù al disè: «In veretât, in veretât us dîs: Chel che nol jentre pe puarte tal sierai des pioris ma si rimpine dentri di un'altre bande, chel li al è un lari e un brigant. Invezit chel che al jentre pe puarte, al è pastôr des pioris. Il vuardean i vierç e lis pioris a scoltin la sô vôs e al clame par non lis sôs pioris e lis mene fûr. Cuant che al à paradîs fûr dutis lis sôs pioris, al cjamine denant di lôr, e lis pioris i van daûr, parcè che a cognossin la sô vôs. No laran mai daûr di un forest ma a scjamparan lontanis di lui, parcè che no cognossin la vôs dai forescj». Jesù ur contà cheste parabule, ma lôr no capirin di ce che al intindeve fevelâur.

Alore Jesù al continuà: «In veretât, in veretât us dîs: O soi jo la puarte des pioris. Ducj chei che a son vignûts prin di me a son laris e brigants. Ma lis pioris no ju àn scoltâts. O soi jo la puarte. Chel che al jentrarà passant par me si salvarà; al jentrarà e al jessarà e al cjatarà passon. Il lari nol jentre che par robâ, par copâ e par fiscâ. Jo o soi vignût par che a vedin la vite e le vedin plui che bondante».

Peraule dal Signôr.

Si dîs O crôt.

Su lis ufiertis

Danus la gracie, Signôr,
di indalegrâsi simpri cun chescj misteris di Pasche
in mût che ce che tu operis cence padin pe nestre salvece
nus fasi vê la gjonde eterne.
Par Crist nestri Signôr.

Antifone a la comunion

Al è resurît il bon Pastôr che al à rimetude la sô vite pes sôs pioris
e pal so trop si è indegnât di murî, aleluia.

Daspò de comunion

Signôr, bon Pastôr, cjale cun voli di afiet il trop dai tiei fedêi
e indegniti di compagnâ tai passons de eternitât
lis pioris sfrancjadis cul sanc tant preseât di to Fi.
Par Crist nestri Signôr.